

San Pablo Galacia cheja pa'inare chu'o tocha saosi'ea'me

Chu'o saosi'ea'me

¹ Chu'u, Pablo, Jesucristo saosi'kujeku pãi chëa saomanesi'kuu'mu. Mai Ja'ku Dios, Repau'te jüniso täcojñosi'kure Vasosi'ku ũcuachi'a chu'ure saoku'mu Repau chu'ore chu'vaa'ku chini. ² Chu'u musanukonare, Jesucristo'te cuasaju Galacia cheja pa'ikuanupũã ija'ova utija'ova chu'ure icheja ja'me pa'ina mai majapãijanana'me tocha saomu. ³ Mai Ja'ku Diona'me Maire Paaku Jesucristoji musanukona rekoñoãna re'oja'che pa'iche cho'okaijuna re'oja'che pa'ijũ'u. ⁴ Repau Jesucristo mai Ja'ku Diopi chiiuna mai cu'ache cho'oche jüni ro'ikaisi'kuu'mu, maipi pãi cu'ache cho'onana'me pa'inata'ni cu'are juvomasiju re'oja'che pa'imasia'ju chini. ⁵ Repau Dios si'arumu cuhama'ñe pojocojñoku, "Peore masiu'mu mu'u; ru re'oku'mu", chiicojñoku paau. Já'aja'ñe paau.

Jesucristo'te cuasache kuachu'ore jachaju tiiñere chu'vache'te kuamu

⁶ Cristo re'oja'che cho'okaisi'ejekuna musanukonare chëa Paaku'te Diore cuasache musanukonapi na'mi jo'kasopi'rajuna asa kukumu chu'u. Jesucristo'te cuasache kuachu'o asa chëa cuasasina chura chekere asa chëaju pa'ime musanukona. ⁷ Repachu'o musanukona mama che'chechu'o vati toa uuche ũsekaiku pa'iche'te kuamachu'oa'me. Pãi Dios chu'o Cristo pa'iche kuachu'ore sa'ñe tiiñe kuaju cacu'oju pa'ime musanukonare. ⁸ Pãi ũcuuanapi chukuna musanukonare chu'vasi'ere Jesucristo'te

cuasache kuachu'ore jachaju repachu'o chu'vama'ñe tiiñere chu'vani vati toare ai sani uuju paapu, chukunapi jā'apāani ángel cunaumu raisi'kupi jā'aja'ñe chu'vanijē'e. ⁹ Chura i'kasi'ere jo'e ũcuare i'kara. Chu'upi chu'vakuna musanukona asa chēasi'ere Jesucristo'te cuasache kuachu'ore ũcuauakuji jachaku repachu'o chu'vama'ñe tiiñere chu'vani vati toare ai sani uuku paau.

¹⁰ Chu'u cho'oche'te pāipi ña pojoa'ju chini cho'oma'ñe Diopi ña pojoa'ku chini cho'oku pa'ikumu chu'u. Pāipi chu'uni pojoa'ju chini cho'oku pani Cristo'te cho'oche cho'okaiku pa'imanera'amu.

Dios chu'ore chu'vaa'ku chini saosi'ku cho'osi'ere kuamu Pablo

¹¹ Asarepajũ'u, chu'u majapāijana. Musanukonapi masia'ju chini i'kamu chu'u ie: Chu'u musanukonare chu'vachu'o Jesucristo'te cuasache kuachu'o rupu pāi cuasasichu'oma'mu. ¹² Chu'ure repachu'o masiche pāi chekunapi che'chomanesinaa'me. Jesucristoji kuasi'kuamumu chu'ure jā'a, masia'ku chini.

¹³ Chu'u Jesure chuta'a cuasamau chukuna judiöpāi cuasache cuasaku pa'irumu cho'osi'e asasinaa'me musanukona. Reparumu Jesucristo'te cuasanani ũcuaukore cacu'ora chini repanare chu'ure peore cho'ore'ochetu'ka cu'ache cho'oku pa'isi'kuamumu chu'u. ¹⁴ Reparumu chukuna aipāi jo'kasi'e judiöpāi cho'oche peore masi cho'oku chu'u majapāi jainukore chu'ujanare na'a ruu masi cho'osi'kuamumu chu'u. ¹⁵ Jā'ata'ni Dios chu'uni chiiu chu'u chuta'a jñaamarumuna chēasi'kuamumu na'a pa'isirumuna Repau'ni cho'oche'te cho'okaau chini. ¹⁶ Chura Repau'te chũ'ure'orumujekuna chu'upi Repau chu'ore asa chēa Mamakuni cuasaku jovo

Jesucristo'te cuasache kũachũ'ore judío peonani chũ'vajaau chini cho'okaisi'kũa'mũ Repau chũ'ure. Repau'te jovosirũmũ Repau chũ'ore che'chera chini chekũnare Jesure cuasanare s̃ejaimanesi'kũa'mũ chũ'ũ. ¹⁷ Ũcuachi'a chũ'ure na'a charo Jesucristo saosinare Jerusalén pa'inare sani ñamanesi'kũa'mũ chũ'ũ. Jã'aja'ñe cho'oma'ñe teana Arabia cheja pãĩ peocheja saisi'kũpi na'a pa'isirũmũna Damasco vũ'ejoopona co'isi'kũa'mũ chũ'ũ.

¹⁸ Choteũsurũmũ pa'isirũmũna Pedroni ña masira chini Jerusalén vũ'ejoopona sani ũcuau'na'me quincerepaumucujña pa'isi'kũa'mũ chũ'ũ. ¹⁹ Jã'ata'ni reparũmũ chekũnare Jesús saosinare te'eu'terejẽ'e ñamanesi'kũa'mũ chũ'ũ. Maire Paaku cho'jeu'te Santiago'techi'a ñasi'kũa'mũ chũ'ũ. ²⁰ Dios asaku'te jorema'ñe chũ'o ũcuarepare kũaku ie chũ'o tocha saomũ chũ'ũ musanũkonare.

²¹ Repanare ñacuhasirũmũ ũcuachejapi Siria chejana'me Cilicia cheja saisi'kũa'mũ chũ'ũ. ²² Mai majapãijana Judea cheja pa'ijũ Cristo'te cuasakuanupũ reparũmũ chũ'ure ñamanajejũ vesũsinaa'me. ²³ Reparũmũ pãĩ chũ'ũ pa'iche cutuche ija'che chiiche'te asajũ paniasome: “Aperũmũ maire Jesure cuasache'te ñsekũ cacũ'ora chini cu'ache cho'oku pa'isi'kũ chura pãipi Jesuni cuasaa'jũ chini Dios chũ'ore chũ'vakũ pa'iuasomũ”, chiijũ paniasome pãĩ. ²⁴ Jã'aja'ñe chũ'ũ cho'оче'te asajũ reparũmũ Dioni, “Re'orepamũ, Ja'kũ”, chiijũ paniasome repaña.

2

Chekũna Jesús saosina Pablo'te pojosi'ere kũamũ

¹ Catorcerepaũsurũmũ pa'isirũmũna Bernabena'me Jerusalén vũ'ejoopona jo'e saiũ Titore ja'me saku

saisi'kua'mu chu'u. ² Diopi chũ'una Repau'te cuasanare ũcuanukore chũ'unarechi'a cutura chini saisikua'mu chu'u repacheja. Chi'ichu'u judío peonare Dios chu'o chu'vache'te kuasi'kua'mu chu'u repanare, kuana masiju repanapi ũsemapuna chu'u cho'ochaji cho'osomanea'ku chini. ³ Reparumu Titore chu'una'me saisikure griegopaiujeku jikomu chã'tiro pa'ica'niru chuto tuacojñomanesi'kureta'ni, "jiko ca'niru chuto tuacojñojũ'u", chiju chũ'umanesinaa'me repana. ⁴ Pãi chekunapi maini Jesure ũcuarepa cuasanani, "Jesure cuasanaa'me chukuna", chiju jorenapi ja'me chi'iju ke'rejuna saisikua'mu chu'u. Repana jorena maipi Jesucristo neenajeju mai rekoñoã cuasache'te re'oja'chere cho'ojuna ñaũu chini raisinaa'me, ña pi'ni chukuna'te pa'ivesache peore chukuna judío aipãi chũ'u jo'kasi'ere cho'ochete chũ'ũu chini. ⁵ Jã'ata'ni chukuna musanukonapi Dios chu'o ũcuarepare Jesucristo'te cuasache kuachu'ore ũcua cuasaju paapu chini repana joreju i'kache jmakarujẽ'e asa cho'oma'ñe ũcua ũcuarepare cho'ojũ pa'inaa'me.

⁶ Jã'ata'ni Diopi pãi ũcuanukore ũcuapa'ruvachi'a cuasakuna Repau'te cuasanare chũ'unare vaju chumanesi'kua'mu chu'u. ũcuachi'a chu'upi repana chũ'una pa'icheja'che pa'inaa chu'ure pojoju, "Ija'che chu'vajaijũ'u mu'u", chiju chũ'umanesinaa'me repana chu'ure. ⁷ Repau Jesucristo'te cuasache kuachu'ore judiopãire chu'vaa'ku chini Dios Pedro'te jo'kasi'ejache chu'ure Repau ũcuachu'ore judío peonani chu'vajaau chini jo'kasi'e chu'upi kuana asa, masisinaa'me repana. ⁸ Repau Dios Pedro'te judiopãire chu'vaa'ku chini jo'ka Cho'okaikujichu'ure ũcuachi'a ũcuaju jo'ka judío peonani chu'vaa'ku chini cho'okaikumu. Jesús

saosinaa'me chukuna ka'chana.

⁹ Jã'ajekuna repana Jesure cuasanare chũ'una Santiagona'me Pedrona'me Juan chu'u Jesús saosi'ku pa'iche'te asa pojoju chukuna'te Bernabena'me chu'ure ija'che i'kasinaa'me: “Musanukona chukunaja'ñe pa'inaa'me”, chiiju, “Musanukonapi judío peonani Dios chu'ore chu'vato re'omu; chukunata'ni judiöpãire ũcua chu'vajju pa'ijanaa'me”, chiisinaa'me. ¹⁰ Iechi'a i'ka jo'kasinaa'me repana chukuna'te: “Chuova'na pa'iva'nare cavesuma'ñe cuasaju re'oja'che cho'okaiju pa'ijũ'u”, chiisinaa'me. Jã'ata'ni chukuna ũcuare si'arumu cho'oju pa'inaa'me.

Pedroji jo'e cho'omanea'ku chini Pablo i'kasi'ea'me

¹¹ Na'a pa'isirumu chu'u Antioquía vu'ejoopo co'isirumu Pedroji ũcuajoopo'te rani pa'iu cu'ache cho'okuna ñaku jo'e jã'aja'ñe cho'omanea'ku chini i'kasi'kuamũ chu'u repau'te. ¹² Reparumu Jerusalén vu'ejoopo Santiagona'me pa'ina chuta'a raimarumu judío peonana'me ãu ãiu pa'isi'kuamũ repau, judiöpãiu'ta'ni. Jã'ata'ni repana raisirumu vajuchuku repau'ni pe'rumanea'ju chini judío peonare cuheku pa'icheja'che ja'me pa'imanesi'kuamũ repau, judío peonarejatũ'ka jĩkomu chã'tiro pa'ica'niru chuto tuacojñoñe chũ'unapi ratena. ¹³ Jã'aja'ñe Pedroji ũcuarepa peoche'te cho'okuna chekuna judiöpãi ña ũcuaja'che cho'osinaa'me. Bernabejatũ'ka repana cho'оче ña ũcuaja'che cho'osi'kuamũ. ¹⁴ Repanapi Cristo chu'o ũcuarepa chũ'uñe'te masi cho'omapuna ña repana asaju'te Pedro'te ija'che i'kasi'kuamũ chu'u: “Mu'u judiöpãiu'ta'ni peore mai judío aipãi jo'kasi'e cho'oma'ñe judío peokuja'che pa'iku'mũ. Jã'aja'ñe pa'ikuta'ni chura judío peonare, 'Musanukona pa'iche

cu'amũ', chiiũ judío pa'iche paapu chini chũ'ũkũja'che cho'omũ mũ'u", chiisi'kũa'mũ chu'u repau'te.

15 Ija'che i'kasi'kũa'mũ chu'u: "Mai chĩrumũna teana judíopãi ainesinaa'me. Jã'ajekũna judío peona cho'ocheja'che cu'ache cho'omanaa'me mai. 16 Jã'ata'ni ie masime mai: Diopi ñato Repauji chũ'ũũna Moisés tocha jo'kasi'e cho'ona pãi te'eujẽ'e re'okũ peojũasome. Jesucristo'te cuasanachi'aasome re'ona, Repauji ñato. Pãi ũcuauanare re'oja'chechi'a cho'ona pa'iuato Jesucristoni cuasaju jovoche pa'imũ. Jã'ajekũna mai judíopãi Repau chũ'ũ jo'kasi'e cho'ojũ ainesinata'ni Jesucristo'te cuasaju jovosinaa'me, Diopi mai cu'ache cho'oche'te tũnosokani jo'e cuasamaũ, 'Re'onaa'me ina', chiaũ chini. Repau aperũmũ chũ'ũ jo'kasi'e cho'onareta'ni te'eũ'terejẽ'e, 'Re'onaa'me ina', chiima'kũa'mũ Repau, repare peore cho'omapũna.

17 'Mai aperũmũ cu'ache pa'isinaa'me. Jã'ajekũna re'ona paũu chini, 'Cu'ache cho'onaa'me chu'ũkũna', chiiũ Jesucristoni cuasaju jovosinaa'me mai. Jã'ata'ni chekũna judíopãi Jesure cuasamana ija'che i'kame maire: 'Jesucristoji cho'okaiũna judíopãi re'oja'che pa'isina mai judíopãi pa'iche'te jo'kaso chura cu'ache pa'ime ina', chiime. Jã'ata'ni joreme repana. Jã'aja'ñema'mũ. Jesucristo jmakarujẽ'e cu'ache cho'oma'kũa'mũ. 18 Chu'ũpi Dios pa'ichejana sasa chini aperũmũ chũ'ũ jo'kasi'e cho'osi'kũpi Jesucristoni jovo chu'ũ cho'osi'e ũhaso pa'ikũji churana ũcuare cho'okũ re'okũ pasa chini jo'e cho'oni Jesucristo chũ'ũñe'te cho'oma'ñe pa'imũ. 19 Aperũmũ, 'Chu'ũpi Dios chũ'ũ jo'kasi'e peore cho'omaneni cho'osoja'mũ', chiiũ cuasasi'kũa'mũ chu'ũ. Jã'are masakũ cho'oche Diore pojõju aperũmũ cho'osimajñarũachi'a jo'kaso Jesucristoni cuasakũ

jovosi'kua'mu chu'u Diona'me re'oja'che pa'iu Repau chiiche'te cho'oku pasa chini.

²⁰ 'Jesucristo jüni ro'ikaicojñosi'kujeku kurususẽ'verona Repau'te jẽ'jo vẽasosi'ea'che cho'ocojñosi'kua'mu chu'u. Jã'ajekuna chu'u chura chu'upi meñe jüni ro'isi'ea'che pa'iu chu'u chiichejẽ'e cho'oma'ñe Cristoji cho'okaiuna Repau chiichechi'a cho'oku pa'iku'mu. Repau'te Dios Mamaku'te chu'uni oi Repauji meñe ñisiku chu'ure jüni ro'ikaisi'kuni cuasaku chu'u icheja cheja pa'irumu cho'oche peore cho'okai pa'iku'mu chu'u. ²¹ Dios chu'ure cho'okaiche cuhema'mu chu'u. Ūcuauji chũ'una Jesucristo maire jüni ro'ikaisi'kua'mu maini Ūcuana'me re'oja'che pa'ire'oa'ku chini. Aperumu chũ'u jo'kasi'ere cho'ojuna maini Diona'me re'oja'che pa'ire'oche pa'ito Cristo maire jüni ro'ikaisi'e jünite'esi'e pa'ira'am. Maipi re'oja'che cho'o koka peojuna jã'aja'ñe Repau aperumu chũ'u jo'kasi'e cho'ojuna Diona'me re'oja'che pa'icu'am maire. Jã'ajekuna Cristo maire oi maire cho'ovesache'te cho'okai jüni ro'ikaisi'kua'mu maire Diona'me re'oja'che paapu chini", chiisi'kua'mu chu'u.

3

Dios pa'ichejana sañu chini Repau aperumu chũ'u jo'kasi'e cho'oma'ñe Diore cuasache'te kumamu

¹ Asarepajũ'u, Galacia cheja pa'ina. Jorena chu'vachu'ore ruarepa asaju vẽ'vena carünisosinaa'me musanukona. Aperumu chukuna musanukonare Jesucristo maire jüni ro'ikaisi'ere pe'keruji ruu masi kuasinaa'me. ² ¿Je'se cho'ojuna Dios Rekocho koore musanukona? ¿Dios aperumu chũ'u jo'kasi'ere peore cho'ojuna koore? Pãasinaa'me. Repau chu'o re'oja'chere

asa chēa Jesuni cuasaju koosinaa'me musanukona Repau Rekocho. ³ Jā'ata'ni chura, ¿je'se pa'ina Dios cho'okaiche'te cuheju rupu aperumu chũ'u jo'kasi'ere cho'oju Dios pa'ichejana saiche cuasache musanukona, Jesure apecuasarumu Dios Rekocho koosinata'ni? Rua tĩñe cuasame musanukona. ⁴ Jesuni cuasaju cu'ache ti'jñecoñona cu'are juvo koka paaju re'oja'che pa'iche na'a rua che'cheme. ¿Musanukona jā'aja'ñe che'chemanere? Che'chesinaa'me. ⁵ Dios musanukonapi Repau chu'o asa chēasi'ere cuasajuna Repau Rekocho'te ĩsi musanukona cho'ocheji Repau cho'omasiche pāi vasoche cho'okaiku'mu. Musanukonapi aperumu chũ'u jo'kasi'ere masi cho'oju'na cho'okaichema'mu jā'a.

⁶ Abraham pa'isi'ere cuasajũ'u. Dios chu'o aperumu tocha jo'kasi'e ija'che kuamu repau pa'isi'e: Abrahamre Repauni cuasakuna, “Re'okumu iku”, chini-asomu Dios, chiimu. ⁷ Ie masiche pa'imu musanukonare: Diore masi cuasana Abraham jocosinajanaa'me repau cuasacheja'che Diore cuasanajeju. ⁸ Dios judío peonare Repauni cuasajuna cu'ache cho'omanare cuasacheja'che cuasaku Repau repanare cho'okaijachere kuaku Abrahamre i'kasi'e Repau chu'o re'oja'che aperumu tocha jo'kasi'e ija'che kuamu:

Mu'upi chu'uni masi cuasakuna mu'u jojojure icheja chejana raoja'mu chu'u

si'avājupaire re'oja'che cho'okaiu paau chini, chiimu Abrahamre Dios i'kasi'e. ⁹ Jā'ajekuna Dios Repau'te masi cuasanare Abrahamre Repauni masi cuasakuna cho'okaisi'ejache re'oja'che cho'okaimu.

¹⁰ Pāi Dios pa'ichejana sañu chini cuasaju Repau aperumu chũ'u jo'kasi'e cho'ona vati toana sani

cho'osojanaa'me. Repau chu'o aperumu tocha jo'kasi'e jā'are ija'che kuamu:

Dios aperumu chũ'u jo'kasi'e tocha jo'kasikorovu pa'iche'te cho'ojũ

peore si'arumu masi cho'omanesina pãi ũcuanuko cho'osojanaa'me,

chiimu. ¹¹ Chekucheja ija'che kuamu:

Diopi ñato Repau'te cuasana re'onaa'me.

Jã'ajekuna repana Ũcuana'me si'arumu re'oja'che pa'ijanaa'me,

chiimu. Aperumu Repau chũ'u jo'kasi'ere cho'ojũ re'ona pañu chiinare pãi te'eu'terejẽ'e, “Re'onaa'me ina”,

chiima'mu Dios. ¹² Aperumu Repauji chũ'una Moisés tocha jo'kasi'e Diore cuasache i'kama'ñe, chũ'usi'e

cho'ochечи'a i'kamũ. Repau chu'o tochasikorovu ija'che kuamu:

Dios chũ'u jo'kasi'e peore masi cho'ona Repau pa'ichejare ai sani pa'ijanaa'me,

chiimu.

¹³ Jã'ata'ni Cristo maire, Dios chũ'u jo'kasi'ere cho'ovesũju te'eu'jẽ'e peore masi cho'omapu

vati toa uura'asinare, mai cu'ache cho'ochечи jũni ro'ikaisi'kuamũ,

maipi vati toana saimanea'ju chini. Maipi cu'ache cho'ocojñomanea'ju chini mai cho'ocojñora'asi'e

Ũcuauji mai cu'are peore ro'ikaiũ si'ache cu'ache cho'osi'ku cho'ocojñoneja'ñe cu'ache

cho'ocojñosi'kuamũ Repau. Dios chu'o aperumu tocha jo'kasi'e ija'che kuamu jā'a:

Pãiu'te tiripuna jẽ'jo nukocojñoku'te ñani,

“Repau cu'ache cho'osi'e ro'ia'me ie”, chijanaa'me pãi,

chiimu. ¹⁴ Jã'ajekuna Dios maire irumu Repau aperumu

Abrahamre, “Mu'u jojocojñojaure si'avãjũpãire re'oja'che cho'okaau chini raoja'mu chu'u”,

chiisi'ere ũcuarepa cho'okũ Jesucristo'te chejana raosi'kũa'mũ, mai cu'are jũni ro'ikakũna maipi Repaũ, “Cho'okaija'mũ”, chiisi'ere si'avãjũpãi Jesuni cuasajũ Repaũ Rekocho'te kooal'jũ chini.

Abrahamre cho'okaija'mũ chiisi'ena'me Moiserere chũ'ũ jo'kasi'ere kũamũ

¹⁵ Chũ'ũ majapãijana, ija'chea'me jã'a: Pãijũ repaũ cho'oja'mũ chiiche'te kũakũ tocha pi'ni mami tocharu chekũpi jo'e na'a rũa kũakũ tochacu'amũ jã'a. Ũcuachi'a sējocu'amũ. Jã'aja'ñea'me Dios cho'oja'mũ chiisi'e.

¹⁶ Dios Abrahamre Repaũ cho'okaijache i'karũmũ repaũ jojocojñojanare jainũkore i'kama'ñe te'eũ pa'ijachechi'a i'kaasomũ repaũ jojocojñojaũ pa'ijachere. Cristoa'mũ repaũ jojocojñosi'kũ. ¹⁷ Jã'arũmũpi cuatrocientos treintarepaũsũrũmũ pa'isirũmũna Dios pãipi ñajũ cho'oju paapũ chini Repaũ chũ'ũñe Moiseni jo'kaasomũ. Jã'ata'ni reparũmũ Abrahamre Repaũ charo i'kasi'e ũhasomaneasomũ Repaũ. Repa Abrahamre i'kasi'e ũcua pa'iu ũcuarepa cho'ocojñocuhamũ. ¹⁸ Diopi Repaũ aperũmũ chũ'ũ jo'kasi'e cho'onani vati toa uuche'te ũsekaito Abrahamre Repaũ na'a charo i'kasi'e jorechũ'o pa'ira'asi'kũa'mũ. Jã'ata'ni Dios maini oiũ Repaũ Abrahamre jã'aja'ñe cho'okaija'mũ chiisi'e ũcuarepa cho'osi'kũa'mũ.

¹⁹ Chekũrũmũ musanũkona chũ'ũ i'kakũ tochache ija'che cuasajũ i'kacosome: “Jã'a pa'ito pãipi ñajũ cho'oa'jũ chini Moisés tochasi'e, ¿je'se cho'ora chini chũ'ũ Repaũ?”, chiicosome. Ija'chea'me: Pãipi Abraham jojocojñosi'kũre Jesucristo'te raorũmũjatũ'ka repa chũ'ũ jo'kasi'ere ña, “Chũ'ũ cu'akũjekũ Dios chiiche re'oja'che cho'ovesũmũ”, chiiju cuasaa'jũ chini jo'kasi'easomũ jã'a. Repa aperũmũ chũ'ũsi'e

Moiseni ángelepi **kuajuna** tocha jo'kaasom**u** maire.
²⁰ Jã'ata'ni Dios Abrahamre i'kasi'e ángelepi **kuakaapu**
 chini **chũ'uma'ñe** Ũcuarepa**uji** i'kasi'ejek**u** na'a re'om**u**.

*Dios Repa***u** cho'ora chiiche'te Moiserere **chũ'u** jo'kak**u**
kuasi'ere **kuamu**

²¹ Jã'ajek**una** Dios Repa**u** Moiserere **chũ'u** jo'kasi'e Abra-
 hamre Repa**u** i'kasi'ere ũhasora chini jo'kasi'ema**uasom**
 jã'a. Maipi Moisés tocha jo'kasi'ere peore masi cho'o**ju**
 pa'ito Diona'me re'oja'che pa'ire'ora'am**u** maire. Jã'ata'ni
 te'e**ujẽ**'e Dios **chũ'u** jo'kasi'e cho'o koka peome mai.
²² Dios **chu'o** aper**umu** tocha jo'kasi'e ija'che **kuamu**:
 Pãi ũcuan**uko** cu'achechi'a cho'o**ju**, pani etajaichejẽ'e
 peoche pa'ime, repa**na** cu'ache cho'oche ro'ijanaje**ju**.
 Jã'ata'ni pãipi Jesucristoni cuasani Dios cho'okaija'm**u**
 chiisi'e re'oja'che cho'okaicojñojanaa'me.

²³ Jesucristo'te cuasache chuta'a ti'amar**umu** **chukuna**
 judíopãi cu'ache pa'ij**u** Dios aper**umu** **chũ'u** jo'kasi'e
 peore masi cho'oves**usinaa**'me. Repare cho'oves**uju** pani
 etajaichejẽ'e peoche pa'ij**u** Dios Mamak**u** rajachere
 cha'aj**u** pa'isinaa'me **chukuna**. ²⁴ Dios **chũ'u** jo'kasi'e
chukuna'te aper**umu** chiĩ kuirakaik**u** cho'oves**unani**
 si'ache **chũ'ukuja**'che Jesucristo rair**umu**jat**u**'ka
 pa'isi'k**ua**'m**u**, repare cho'oves**ujuna**. Jã'aja'ñe
 pa'isinare Dios **chukuna**'te Jesucristo pa'iche'te asa
 chãa Ũcu**u**ni cuasaj**una**, "Re'onaa'me ina", chiim**u**
 chura. ²⁵ Jã'ajek**una** chura Jesucristo'te cuasanaje**ju** Dios
 pa'ichejana sañu chini Repa**u** aper**umu** **chũ'u** jo'kasi'e
 cho'osina ũcuamakar**u** cho'oñu chiime **chukuna**.
²⁶ M**usanukona** ũcuan**uko** Jesucristo'te cuasanaje**ju**
 Dios chiĩa'me. ²⁷ M**usanukona** ũcuan**uko** Repa**u**ni
 cuasaj**u** okoro'vecojñosina chura Cristo pa'icheja'che
 re'oja'che pa'inaa'me. ²⁸ Maire Jesucristo'te cuasanare

ũcuapa'rũvachi'a cuasamũ Dios, judíopãina'me judío peonare, pãĩ chũ'unana'me chũ'ũcojñonare, umũpãina'me romi. Mai ũcuanũko Jesucristo'te cuasanajejũ ũcuate'eũjakuanupũ'me. ²⁹ Ũcuachi'a Jesús neenajejũ Abraham jojocojñosinaja'ñe pa'ijũ Dios aperumũ re'oja'che cho'okaija'mũ chiisi'ejekũna repaũ'te re'oja'che cho'okaicojñojanaa'me musanũkona.

4

¹ Ija'chea'me: Kuriũ mamakũ pũka'kũ jũnisosirumũ repaũji chuta'a chĩiva'ũ pani pũka'kũ paasi'e peore paava'ũta'ni rupũ chẽa paacojñova'ũja'ñe pa'imũ. ² Repaũ ainee pi'nirumũjatũ'ka repaũ'te kuiranana'me repaũ paache kuirakaina chũ'ũñe'te cho'oche cho'okaiũ pa'iche pa'imũ repaũ'te pũka'kũ i'ka jo'kasirumũjatũ'ka. ³ Mai ũcuaja'che chuta'a Jesure cuasamarumũ chĩiva'naja'ñe pa'ijũ Repaũ'te cuasamanare chũ'ũna vati chũ'ũñe'te cho'okaijũ pa'isinaa'me. ⁴⁻⁵ Jã'ata'ni Dios, Repaũ i'ka jo'kasirumũ tĩ'aũna Mamakũ'te chejana raosi'kũ'a'mũ, pãioji paaona judíopãĩũjekũ Repaũ aperumũ chũ'ũ jo'kasi'ere cho'okũ ainee pi'ni Repaũ majapãire repana cu'are jũni ro'ikakũna Dios pa'icheja saũu chini aperumũ chũ'ũ jo'kasi'ere ũcuamakarũ cho'oa'jũ chini. Ũcuachi'a maipi ũcuanũko Repaũ chĩi paapũ chini jã'aja'ñe cho'oasomũ Dios. ⁶ Repaũ Mamakũ cho'okaisi'ejekũna Maire Repaũ chĩijejũna mai rekoñoãna Repaũ Rekocho raosi'kũ'a'mũ Dios. Jã'ajekũna Repaũ'te Diore Ũcuau Rekochoji cho'okaiũna vajuũchũma'ñe, "Ja'kũ", chiinaa'me mai. ⁷ Jã'aja'ñejekũna chura oicojñoma'ñe rupũ cho'ochechi'a cho'okaapũ chini chẽa paacojñomanaa'me mai. Dios chĩia'me. Repaũ chĩijejũ Ũcuauji ĩsikũna koojanaa'me mai Repaũ paache peore.

“*Jesure cuasanapi cacu'asoju*”, chini cuasaku oimũ Pablo

⁸ Aperũmũ musanũkona chuta'a Diore cuasaju jovomarũmũ, rupũ tũosiva'nare dioma'ñere pojosinaa'me, Diorepaũ'te cuasaju pojocheja'che. Jã'ajekũna rupũ tũosiva'na chẽa paacojñonaja'ñe pa'isinaa'me. ⁹ Chũkũna judíopãita'ni Jesure chuta'a cuasamarũmũ Dios aperũmũ chũ'ũ jo'kasi'e cho'oju pa'isinaa'me. Chura musanũkona chũkũna judíopãi fiestaumucujña cho'ocheja'che si'ache cho'oju pa'ijũasome, Diopi ña, “Re'onaa'me ina”, chiaũ chini. Musanũkona chũkũna judíopãi Jesure jovorũmũ jo'kasosi'ere cho'oju musanũkona jovorũmũ jo'kasosi'ere co'icheja'che jo'e cho'oju cho'ote'eme. Jesure jovosinajeju Dios pa'iche'te masiju Repaũ'te cuasanaa'me musanũkona. Ūcuachi'a Dios musanũkonare masimũ. Jã'aja'ñe pa'inata'ni, jjo'e tũosiva'na chẽa paacojñosi'ejja'che pañũ chiiche? ¹⁰ Fiestaumucujña judíopãi cho'ocheja'che si'ache cho'oju pa'ijũasome musanũkona, Diopi ña, “Re'onaa'me ina”, chiaũ chini. ¹¹ Musanũkona jã'aja'ñe cho'oche'te asaku, “Chũ'ũ repanare chũ'vasi'e peore cavesũsocuhacosome”, chiiũ rũa sũma'ñe cuasaku pa'imũ chũ'ũ.

¹² Asarepajũ'ũ, chũ'ũ majapãijana. Chũkũna judíopãi pa'iche jo'kaso musanũkona judío peona pa'icheja'che pa'ikũ'mũ chũ'ũ. Chura musanũkonare chũ'ũ Diore cuasarepaku pa'icheja'che pa'ijũ'ũ, chiimũ chũ'ũ. Musanũkonare ja'me pa'irũmũ cu'ache cho'omanesinaa'me musanũkona chũ'ũre. Irũmũ ũcuachi'a chũ'ũre cu'ache cho'oma'ñe chũ'ũ i'kache'te asajũ'ũ. ¹³ Musanũkona chũ'ũ pa'iu cho'osi'e masime. Reparũmũ Jesucristo'te cuasache kũachũ'o

mʉsanʉkonare chʉ'u chareparo chʉ'varʉmʉ ravʉ jũ'ikʉji chʉ'vasi'kʉa'mʉ chʉ'u. ¹⁴ Mʉsanʉkona chʉ'ʉpi jũ'iʉna chʉ'ʉre ña vajʉchʉsinaa'me. Jã'ata'ni chʉ'ʉre, "Jũ'imʉ ikʉ", chini cuhemanesinaa'me. Cuhema'ñe ángel'te Dios raocojñosi'kʉre ña pojocheja'che pojosinaa'me mʉsanʉkona chʉ'ʉre. Ũcuachi'a Jesucristo'te ña pojocheja'che pojosinaa'me mʉsanʉkona chʉ'ʉre. ¹⁵ Jã'aja'ñe pojojʉ pa'isina, ¿chura je'se cho'ore mʉsanʉkona pojojʉ pa'isi'e? ¿Cavesʉsocuhare? Reparʉmʉ mʉsanʉkona chʉ'ʉre peore cho'ore'ochetʉ'ka re'oja'che cho'okaijʉ cho'ore'oche pa'ito mʉsanʉkona ñakocaãjatʉ'ka ru'te ñsira'asinaa'me chʉ'ʉre. ¹⁶ Chura mʉsanʉkona chʉ'ʉpi chʉ'o ũcuarepare i'kaʉna, ¿chʉ'ʉre cuhena carũnisore?

¹⁷ Repana tĩñe chʉ'vana mʉsanʉkonare ruʉ chʉ'vaneenata'ni repana rekoñõã re'oja'che cuasamana-jejʉ re'oja'che cho'okaicuheme. Mʉsanʉkonapi chʉkʉnani cuhejʉ repanarechi'a chiijʉ paapʉ chini i'kame repana. ¹⁸ Mʉsanʉkona chekʉnare pãi chiito re'omʉ. Jã'ata'ni re'oja'che cho'okaichejẽ'e cuasama'ñe rupʉ chiito cu'amʉ. Ũcuachi'a mʉsanʉkonapi chʉkʉna'te ja'me pa'irʉmʉchi'a chiito cu'amʉ. Chiirepana pani te'eñoã chiima'ñe si'arʉmʉ chiijʉ pa'ime. ¹⁹ Asarepajũ'u, chʉ'u chiijana. Mʉsanʉkona pa'iche'te ña jo'e chʉ'u rekocho romio chĩipi'rasi'ko asikʉna oicheja'che oimʉ chʉ'u. Mʉsanʉkona Cristo pa'icheja'che re'oja'che pa'iche che'chesirʉmʉjatʉ'ka jã'aja'ñe oimʉ pa'ija'mʉ chʉ'u mʉsanʉkonare. ²⁰ Mʉsanʉkonani na'a masi chʉ'vara chini ja'me pasa chini oimʉ chʉ'u. Jã'ata'ni so'ore pa'iu mʉsanʉkona pa'iche'te ñamaʉna masi chʉ'vacu'amʉ chʉ'ʉre.

Agana'me Sara pa'isi'ere kʉamʉ

²¹ Musanukona aperumu chũ'u jo'kasi'e cho'oñu chiinata'ni asavesume repa kuache. ²² Ija'che kuamu: Abraham te'eka'chapanare chĩi paaasomu, chẽa paacojñoko mamakuna'me rũjorepao mamaku'te. ²³ Chẽa paacojñoko mamaku rupu chĩi si'arumu paacheji paacojñoasomu. Rũjorepao mamakuta'ni Dios ĩsija'mu chiicojñosi'kujekuna Ūcuaju ĩsuna chĩi paacu'asi'kopi paaasomo. ²⁴ Repana romi te'eka'chapana pa'iche Dios, "Ija'che cho'oñu", chiisi'e ka'chamajñaja'ñe pa'iu, Dios maire cho'okaiche'te kuamu. Aperumu chũ'u jo'kasi'e cho'ochena'me maire jũni ro'ikaisi'kure Jesucristo'te cuasajuna Repau cho'okaiche kuamu repana pa'iche. Aperumu chũ'u jo'kasi'e cho'ona chẽa paacojñonaja'ñe pa'ime. Chẽa paacojñosi'ko Agar pa'isi'e Sinaí aikũti pa'irumu chũ'usi'ere kuamu. ²⁵ Repao Agar pa'iche repaona'me mamachĩi chẽa paacojñonachi'ajeju Arabia cheja pa'ikũti Sinaí aikũti chũ'u jo'kasi'ena'me Jerusalén vu'ejoopo irumu pa'ijoopo pa'iche'te kuamu. Jerusalén vu'ejoopo pa'ina judíopai Dios pa'ichejana sañu chini Repau aperumu chũ'u jo'kasi'e cho'onajeju ũcuanuko chẽa paacojñonaja'ñechi'a pa'ime. ²⁶ Jã'ata'ni cunumu pa'ijoopo mama Jerusalén vu'ejoopo chẽa paacojñona pa'ijoopoma'mu. Mai repajoopo pa'inaa'me maire jũni ro'ikaisi'kure Jesucristo'te cuasanajeju; rũjorepao Sara mamachĩijanaa'me. ²⁷ Dios chu'o aperumu tocha jo'kasi'e jã'are ija'che kuamu:

Chĩi paacu'akuna chĩi peova'ota'ni pojoko pa'ijũ'u mu'u.

Chĩi paamanesi'kota'ni pojoko cuiko sojũ'u.

Mu'u jojojanare ruu jainukore paaja'mo mu'u.

Irumu muũju chĩi paako'te na'a ruu jainukore paaja'mo mu'u,

chiimũ. ²⁸ Asarepajũ'ũ, chũ'ũ majapãijana. Mũsanũkona Dios Abrahamre, “ĩsija'mũ chũ'ũ mũ'ũre”, chini ĩsicojũosi'kũ Isaac pa'icheja'che pa'ime. Mũsanũkona cho'okaicojũojañere i'kakũ, “Mũ'ũ jojojaũre chejana raoja'mũ chũ'ũ, si'avãjũpãire re'oja'che cho'okaaũ chini”, chinasomũ Dios repaũ'te Abrahamre. ²⁹ Reparũmũ repaũ mamakũ rupũ chĩ si'arũmũ paacheji Agar paasi'kũpi chekũni Dios Rekochoji cho'okaiũna rũjorepao Sara mamakũni Isaani cu'ache cho'okũ paniasomũ. Irũmũ ũcuaja'che pa'imũ. Maire Jesure cuasanare Dios aperũmũ chũ'ũ jo'kasi'e cho'onapi rũa cuhejũ pa'ime. ³⁰ Dios chũ'o aperũmũ tocha jo'kasi'e ija'che kũamũ:

Chẽa paacojũoko'te repao mamakũna'me eto saosojũ'ũ. Repao mamakũji pũka'kũ paache'te koomanea'kũ; rũjorepao mamakũji pũka'kũ paache'te kooa'kũ, chiimũ. ³¹ Asarepajũ'ũ, chũ'ũ majapãijana. Dios pa'ichejana saũu chini Repaũ aperũmũ chũ'ũ jo'kasi'e cho'omanajejũ chẽa paacojũosi'ko chĩ pa'icheja'che pa'imanaa'me mai. Jesucristo'te cuasanajejũ rũjorepao mamachĩja'ñe pa'ijũ Dios chĩia'me mai.

5

Jo'e chẽa paacojũonaja'ñe pa'ima'ñere kũamũ

¹ Cristo maire chẽacojũosinani etocheja'che cho'okanasomũ, maipi re'oja'chere maire cho'ouache'te cho'omasia'jũ chini. Jã'ajekũna ñarepajũ pa'ijũ pãipi Dios aperũmũ Repaũ'te pojoju cho'oche chũ'ũ jo'kasi'ere cho'oa'jũ chini mũsanũkonani chũ'ũto juvo koka paajũ cho'omanejũ'ũ, jo'e chẽa paacojũonaja'ñe pa'imaneñu chini.

² Asarepajũ'ũ. Chũ'ũ, Pabloji, mʉsanũkonare cacu'amañeajũ chini i'kamũ. Mʉsanũkonapi jĩkomu chã'tiro pa'ica'nirũ chũto tũacojñoni Cristo mʉsanũkonare cho'okaisi'e karakũna cho'ocheja'che cho'ojanaa'me. ³ Jo'e ũcuare i'kara. Pãi jĩko ca'nirũ chũto tũacojñonare ũcuanyũkore Dios aperũmũ chũ'ũ jo'kasi'e peore masi cho'oche pa'imũ. ⁴ Mʉsanũkona te'ena Dios aperũmũ chũ'ũ jo'kasi'ere cho'oju Repaũni, “Re'onaa'me ina”, chiicojñonũ chini cho'onajeju Repaũ re'oja'che cho'okaisi'ere cuhenajeju Cristona'me pa'imanaa'me. ⁵ Chũkũnata'ni Dios pa'ichejana sañũ chini Repaũ aperũmũ chũ'ũ jo'kasi'e cho'oma'ñe Dios Rekochoji cho'okaiũna Jesure cuasanajeju jmamakarũjẽ'e karama'ñe Diona'me re'oja'che pa'ijachere pojoju cha'aju pa'inaa'me. ⁶ Jesucristo'te cuasaju jovo pa'inare, “Jĩko ca'nirũ chũto tũacojñoja'ñe chũ'ũ? JũPãaja'ñe?”, chiiũ cuasachejẽ'e peomũ. “Repaũni masi cuasaju chekũnani päire ña oiju re'oja'che cho'okaiju pañũ”, chiiju cuasache'me re'oja'che.

⁷ Rũa re'oja'che pa'isinaa'me mʉsanũkona. JũNeepi cho'orena Jesús pa'iche kũachu'o Dios chũ'o ũcuarepa i'kache cho'osinata'ni jo'kasore mʉsanũkona? ⁸ Mʉsanũkonare chẽa paaku Dios chũ'ũsi'ema'mũ jã'a, Repaũ chũ'o ũcuarepare päipi jo'kasoajũ chini i'kache. ⁹ Ija'che i'kanaa'me päi: “Pã saũca'rerũ jmaca'rerũji harinaca'repũ ujacarepũna maña ja'meru peore repaca'repũ kosa na'a ujacarepũ saũmũ”, chiime. ũcuachi'a chekũrũmũ päiũ te'eũji jorechũ'ore che'choku pani chekũnare päi jainũkore cacu'omũ. ¹⁰ Maire Paakuji cho'okaiũna mʉsanũkona masi cuasajache masimũ chũ'ũ. Jã'ata'ni päi mʉsanũkonani

cacũ'oũu chini jorechũ'o che'choju ku'inare ũcuanũkore cu'ache ti'jñeñe chũ'ũja'mũ Dios, repana cu'ache cho'oche ro'i.

¹¹ Asarepajũ'ũ, chũ'ũ majapãijana. Chũ'ũ chura jĩkomu chã'tiro pa'ica'nirũ chũto tũacojñoñe chũ'vama'kũa'mũ. Chũ'ũpi chuta'a Jesure cuasanani, “Jĩko ca'nirũ chũto tũacojñojũ'ũ”, chiiũ chũ'vakũ pa'ito judíopãi chũ'ũre cu'ache cho'oũu chiimanera'ame. Ũcuachi'a chũ'ũpi, “Jĩko ca'nirũ chũto tũacojñojũ'ũ”, chiiũ chũ'vato repana judíopãi Jesucristo kurususẽ'verona jũni ro'ikaisi'e kũache asa pe'rumanera'ame. ¹² Repana jorena jĩko ca'nirũ chũto tũacojñoñe'te chũ'ũju mũsanũkonare cacũ'oju ku'ina ũcuanapi meñe teana chũto ru'tesoa'ju!

¹³ Asarepajũ'ũ, chũ'ũ majapãijana. Dios mũsanũkonare uache'te re'oja'chere cho'omasia'ju chini chẽa paamũ. Jã'ajekũna juvoma'ñe cu'ache'te ũcuauache cho'oju pa'ima'ñe sãĩñechi'a oiju re'oja'chere cho'okaiju pa'ijũ'ũ. ¹⁴ Dios chũ'o aperũmũ tocha jo'kasi'e jã'are ija'che kũamũ:

Mũsanũkona meñe oicheja'che chekũnare oiju pa'ijũ'ũ, chiimũ. Jã'aja'ñe cho'ona Dios chũ'ũñe cheke pe-ore cho'ome. ¹⁵ Ñarepaju pa'ijũ'ũ; mũsanũkonapi sãĩñechi'a ke'reju cavache'te ũhasoma'ñe ũcua cavaju pani sãĩñechi'a cho'oju cacũ'osoju pa'ijanaa'me.

Maire cho'ouache cho'oma'ñe Dios Rekocho chũ'ũñechi'a cho'oche'te kũamũ

¹⁶ Jã'ajekũna mũsanũkonare chũ'vamũ chũ'ũ ie: Dios Rekocho chũ'ũñechi'a cho'oju pa'ijũ'ũ. Jã'aja'ñe cho'oni mũsanũkonare cho'ouache cu'a ũcuauache cho'oju pa'imanejanaa'me mũsanũkona. ¹⁷ Dios Rekocho re'oja'checi'a Chũ'ũrekochojekũ cu'ache cho'oche ũsemũ maire. Mai rekoñoã ũcuaja'che cu'arekoñoãjekũ

cu'achechi'a cho'ora chiiu Dios Rekocho chũ'uñe re'oja'che cho'ocuhemu. Pãi te'eka'chapana sãinechi'a cavacheja'che cho'omu maire rekoñoã cu'ana'me re'oja'che. Jã'ajekuna mai cho'oñu chiiche re'oja'che koka peojũ cho'ovesunaa'me mai. ¹⁸ Jã'ata'ni maipi Dios Rekochoji cho'okaiuna Reparekocho chũ'uñe'te cho'oju pa'ito Repau aperumu chũ'u jo'kasi'e cho'oche chiima'mu maire.

¹⁹ Mai rekoñoã cu'ache cho'ouache masime mai. Ija'chea'me: Rũjoromi peonare ja'me kãine, ũcuachi'a ũjũpãi peonare ja'me kãine, cu'are cuasaju cu'ache cho'oche. ²⁰ Cheke rupũ tũosiva'nare pojoche, chai cho'oche, sãinechi'a cuheju cavache, chekuna paamajñarũã tuu paauche cuasache, na'mi pe'ruche, chekunare na'a ruu masiuche, sãinechi'a ke'reju ja'me pa'ima'ñe, te'ekuanuchi'a pa'iche. ²¹ Chekunare pojojũ pa'ima'ñe, cono jũ'ijũ ãu ruarepa ãijũ cu'ache cho'ochena'me cheke ruu si'ache. Musanukonare jã'aja'ñe cho'oju pa'imanea'ju chini jo'e i'kamũ chu'u. Jã'aja'ñe cho'oju pa'ina Dios pa'icheja saimanejanaa'me.

²²⁻²³ Jã'ata'ni Dios Rekochoji cho'okaiuna ija'che cho'omasime mai: Pãi oiche, pojojũ pa'iche, cavama'ñe pa'iche, pojojũ cha'ache, re'oja'che cho'okaiche, ãsema'ñe ïsiche, ũcuarepa cho'oche, pe'kerũ pa'ichena'me cu'ache cho'oche juvomasiche. Jã'aja'ñe cho'ona re'oja'che cho'onaa'me. Jã'aja'ñe cho'oche Dios aperumu chũ'u jo'kasi'e te'emakarujẽ'e ãseche peomu. ²⁴ Mai Jesucristo neena maire cu'ache cho'ouache juvojũ ũhasosinajeju cho'omanaa'me chura. ²⁵ Chura Dios Rekochoji ja'me pa'iu cho'okaiuna Reparekocho chũ'uñe'chi'a cho'oju pañu mai.

²⁶ Maipi meñe, "Ruu masinaa'me chukuna", chiiju pojomanenũ. ũcuachi'a chekunani cuheju cu'ache i'kaju

te'ekuanuchi'a pa'imaneñu mai.

6

Sãinechi'a cho'okaij pa'iche'te *kuamu*

¹ Asarepajũ'u, chu'u majapãijana. Mũsanũkonare ja'me pa'iku Diore cuasakuji te'eu cu'ache cho'оче ñani mũsanũkonapi Diore masi cuasanapi pe'keru i'kaju chu'vajũ'u repau'te jo'e cho'omanea'ku. Jã'ata'ni ñarepaju pa'ijũ'u; chekurumu repau cu'ache cho'оче'te ñato mũsanũkonani ũcuaja'che cho'ouaku.

² Mũsanũkonare pa'ivesache pa'irumu sãinechi'a re'oja'che cho'okaiju pani Cristo chũ'uñe'te jachama'ñe cho'oju pa'ijanaa'me mũsanũkona.

³ Pãiu ũcuauakuji vesukuta'ni meñe, "Rua masiku'mu chu'u", chiiru cuasaku ũcuauji meñe joremu. ⁴ Mũsanũkona ũcuanuko te'enachi'a pa'iche'te meñe cuasajũ'u masiñu chini. Jã'ata'ni mũsanũkonapi re'oja'che pani chekuna pa'iche'te ña, "Jã'anare na'a re'oku'mu chu'u", chiiju cuasama'ñe mũsanũkona pa'ichechi'a cuasaju pojojũ'u. ⁵ Diopi maini pa'iche'te si'ache jo'kauna cho'omajñarũ si'acairo cho'oju pa'iche pa'imu maire.

⁶ Dios chu'o che'chocojñonapi mũsanũkonare che'choku'te kuiraju si'ache ĩsiju pa'ijũ'u, repau chiiche.

⁷ Tiiñe cuasamanejũ'u mũsanũkona. Dios peore ñakujeku pãiu ũcuanuko cho'оче ro'iche chũ'uku'mu. Pãiu ũcuauana Repau'te joreñu chiito cu'amu, peore masikuna. ⁸ Pãiu ũcuauakuji repau'te cho'ouache'te cu'are ũcuauache'te pojoku cho'oku pani Diopi chũ'uuna cho'osoja'mu, repau cu'ache cho'osi'e ro'i. Dios Rekocho chũ'uñe'te pojoku cho'oku pa'ikuta'ni Dios pa'ichejana ai sani si'arumu re'oja'che pa'ija'mu.

⁹ Re'oja'che cho'oche cho'o ca'nasoma'ñe cho'ojũ pañu mai. Maipi cuhasoma'ñe ũcua cho'ojũ pani mai re'oja'che cho'osi'e ro'i koojanaa'me, Diopi Repaũ'te uarũmũna ñsikũna. ¹⁰ Jã'ajekũna maire cho'ore'orũmũna pãire ũcuanũkore oijũ si'arũmũ re'oja'che cho'okaijũ pañu mai. Jã'aja'ñe cho'ojũ mai majapãijanani Jesure cuasanani na'a rũa re'oja'che cho'okaijũ pañu.

Cuhacho chũ'vaku chũ'o saosi'ea'me

¹¹ Ñajũ'ũ imajña chũ'ũ tochasimajña chũ'ũ jũtũpi rũa ujamajñapi mũsanũkonare tocha saоче. Inũkorũ chũ'ũrepaũji ija'ova tocha pi'nimũ. ¹² Repana mũsanũkonare jĩko ca'nirũ chũto tũacojñoajũ chini chũ'ũna Jesucristo'te kurususẽ'verona jũni ro'ikaisi'kũre cuasanata'ni pãipi repanarechi'a chiapũ chini cho'onajejũ jã'aja'ñe cho'ome, pãire cu'ache i'kacojñomaneñu chini. ¹³ Jã'ata'ni repana jĩko ca'nirũ chũto tũacojñosina Dios aperũmũ chũ'ũ jo'kasi'e peore masi cho'omanaa'me. Repana chũ'ũñe'te mũsanũkonapi asa cho'ojũna chekũnapi asa ũcuanani pojoajũ chini jã'aja'ñe chũ'ũme repana. ¹⁴ Chũ'ũta'ni pãipi chũ'ũni pojoajũ chini cho'oma'kũa'mũ. Jã'aja'ñe cho'oma'ñe Maire Paakũ Jesucristo mai cu'are ro'ikaiũ kurususẽ'verona jẽ'jocojño jũni ro'ikaisi'ere pojokũ kũakũ pasa chiikũ'mũ chũ'ũ. Jã'achi'a cuasakũ Repaũ'te cuasamana cho'ocheja'che cho'ocuhemũ chũ'ũ. Jã'ajekũna repana chũ'ũre cuhena'a'me, repana pa'icheja'che pa'imaũna. ¹⁵ Diopi ñato pã jĩko ca'nirũ chũto tũacojñosinana'me cho'omanesina re'onama'me. Repaũ Rekochoji cho'okakũna repana rekoñoã re'ojarekoñoã care'vacojñosinaa'me re'ona, Repaũji ñato. ¹⁶ Jã'aja'ñe pa'iche asa chẽa pa'inare Diopi

oiu re'oja'che pa'iche ĩsia'ku, Repau neena ũcuarepa pa'inare ũcuanukore.

¹⁷ Pāi chu'ure jo'e na'a ruu pa'icu'ache ke'remanea'ju, Jesucristo pa'iche'te chu'vaku chu'u ca'nivu asi cho'ocojño ja'jusimajña ruu paaku'te.

¹⁸ Chu'u majapājana, Maire Paaku Jesucristoji oiu rekoñoña re'oja'che cho'okaiu paau musanukonare. Jā'aja'ñe paau.

Pablo

Dios Chu'o Kuaphuro

Koreguaje: Dios Chu'o Kuaphuro New Testament

copyright © 2009 Wycliffe Bible Translators, Inc.

Language: Koreguaje

Contributor: Wycliffe Bible Translators, Inc.

All rights reserved.

2020-11-18

PDF generated using Haiola and XeLaTeX on 14 Jun 2022 from source files dated 4 Mar 2022

87a345ac-83c6-51ad-8750-17a703f38bcc